

25. april 2017

Uunga siunnersuut: Akileraaruserinermik ingerlatsineq pillugu Inatsisartut inatsisaata nr. 11, 2. november 2006-imeersup allanngortinneqarneranik Inatsisartut inatsisaat nr. xx, xx. xxx 2017-imeersoq. (Akileraaruseriffiup aamma Naalakkersuisut oqartussaaffiik agguataarineq il.il.)

(Aningaasaqarnermut Akileraartarnermullu Naalakkersuisoq)

Siumumiit imatut oqaaseqarfigissavarput.

Akileraaruserinermik ingerlatsineq pillugu inatsisip allanngortinnissaamik Naalakkersuisut siunnersuuteqarput, naatsorsuuserinermi pitsaassutsip annertusarneqarnissaannik siunertaqartumik.

Naalakkersuisut isigaat ilaatigut elektroniskiusumik akiligassiisalernissamut ikaarsaariarnermut ingerlanneqartumut atasutut.

Inatsisikkut periarfissaalissasoq Naalakkersuisut maleruagassanik aalajangersaanissamut piginnaatinneqarnissaat siunnersuutigineqarpoq. Assersuutigalugu naamagittaalliteqarnissamut piffissaliussat, aalajangikkap naamagittaalliutigineqarsinnaanerata naamagittaalliutigineqarsinnaanginneraluunniit maleruagassanik aalajangersaanissamut, aammattaaq suliaasaqarfinni ataasiakkaani naamagittaalliornissamut periarfissat ersarinnerulernissaanik siunertaqarfiusut.

Taamatutaaq akileraartarnermi aqutsivimmuut naamagittaalliutigineqarsinnaasut Naalakkersuisunut naamagittaalliutigineqarsinnaanginnerannik aalajangersaasoqarpoq

Siumumi pingaartutut isigaarput Naalakkersuisunullu nakkutigeqqullugu Inatsit manna innuttaasut sullinneqarnerisa ajornerulersinneqarneranik kinguneqannginnissaa, innuttaasummi inatsisikkut periarfissatigut pitsaasumik sullinneqarnissaat qulakkeerneqartariaqartoq Siumumi isumaqarpugut. Taamaattumik ersarissunik sinaakkusiinissaq pisariaqartoq Naalakkersuisut siunertarimmassuk siunnersuut naamagisimaaratsigu oqaatigissavarput. Pisortanimi sullissinermi suliaasat pisariaqanngitsumik uteqattaariffiunngitsumik suliarineqarnissaat pingaaruteqarpoq innuttaasut sullinneqartut eqqarsaatigalugit, tamannalu ilanngullugu qulakkeerneqassasoq kaammattuutigaarput,

Oqartussaaffiit pillugit maleruagassanik, kiisalu naamagittaalliorsinnaanerup killilerneqarnissaa maleruagassanik Naalakkersuisut aalajangersaasinnaanerata siunnersuutikut atuutilersinneqartussaammat, inatsisissatut siunnersuut aappassaaneerneqartinnani Aningaasaqarnermut Akileraartarnermullu Ataatsimiititaliami suliarineqarnissaa innersuussutigaarput.

Jens Immanuelson
Siumut